

欽
定
全
唐
文

欽定全唐文卷四百二十七目錄

于邵五

華陽屬和集序

送張都督赴嘉州序

送王郎中赴蘄州序

送李員外入朝序

送峽州劉使君忠州李使君序

送賈中允之襄陽序

送太子僕馬公序

送趙評事之東都序

送譚正字之上都序

送劉協律序

送紀奉禮之容州序

送李校書歸江西序

宴餞崔十二弟校書之容州序

送蘭舍人兼武州長史序

送蘭侍御使還序

春宵餞盧司馬丈歸澧陽序

送前鳳翔楊司馬赴節度序

送王司議季友赴洪州序

送張中丞歸魏博序

送盧侍御赴恒州使幕序

送高侍御還鳳翔序

送鄭判官之廣州序

送尹判官之江陵序

宴餞嚴判官使還上都序

送崔判官赴容州序

送房判官巡南海序

欽定全唐文卷四百二十七

于邵五

華陽屬和集序

六藝詩人之蘊雅貫三極而正存象外班九流而化行天下夫然則游夏登科於孔門獨擅文學雖風流萬古而易者文乎哉且日新之謂盛德崇業之謂不朽自大劒之南在漢有文翁實長西蜀開設學校爲來者宗師順流千載而餘芳不泯歷魏有高朕晉有張華皆好古博聞能述先事講信修睦傳之無窮是以在縣有巴渝有挾鼓濮率

相勸道人無隱焉泊大厯初尚書左僕射冀國崔公登壇受命邊鄙不聳旣國用偃武而家將訓文近取諸身旁求是類高選幕客無非其人彬彬然文質協乎中而英華發乎外矣殿中侍御史滎陽鄭公道同斯應參乎理戎以玉帳之暇而清詞閒作盈我懷袖式歌且謠以爲離羣索居誰與晤語故自相府及冀公達於儲公凡所獻酬纘爲三卷仍以屬和爲集之目夫屬和者唱予和汝擊發商徵亦取諸伐木相求之義斯蓋鄭君之意也同聲于郤聞而且喜卽之寓目煜若春榮遂詢我以宣布咨我以序引取彼

敝帚無相患焉

送張都督赴嘉州序

伊人之平康由我以專達否則政弛人何賴焉在昔漢宣
永懷至理思與二千石之良者共之貞深其元以化天下
非道熙陟降理際天地則不可膺是高選尚書左僕射冀
國公審才以底用論定而後請將欲更蘇息復整齊且如
張公無出其右繫受授則爲憺怛彼嘉陽之人所益多矣
況學致廣大心自精微議道置法若示諸掌一舉雲翼三
十爲郎分兵領部義然後取以公之才大時論用少以今

之多艱乎謂用大則用之大用小則用之小在我而已抑
無惜焉良月選吉輕舟旣具長空青冥未有黃落緹騎百
從載旌而前戈矛生風左右如武且犀灘古地熊阜外虞
通波萬里并容攸攝其無以易者盍思無邪耶嘗寮爲心
望此行矣大幕邀餞三軍助較樂只君子如何可忘而後
利涉信宿人歸父母其顏渥丹下令如春受教賜知常謀
始疑不浹年而國賦足軍實倍啟迪恢達爲諸侯雄

送王郎中赴蘄州序

大君當宇之七載也日月會於降婁有詔尚書倉部郎中

王公恭寬敏惠出典于蘄蘄之上有革車外賦有牙幢華
領思與良二千石共理者朝廷久之亦旣俞往允茲僉屬
曾未浹辰抗手言邁惜此別易合宴公堂期其出郊于以
送遠且觀坐彼一方困于無告誰爲禁暴聞公知歸邦非
人則不寧政無從則奚措今所往者人安之哉公之下車
曾是爲念以公之素範不敢言利因公之善價無乃近名
唯名之崇唯德是累將善救物繫公冀焉然後導達其和
發萌以慮化行無二當借寇恂理平第一更徵黃霸他日
之會賓寮有光悠悠旆旆春物想青林之漲水見黃

石之平磯佳興未孤前期猶邈賦詩追餞者翰林之故事
吾何閒然

送李員外入朝序

食租衣稅王者之常賦自至德改元之後兵連天下軍用
仰給四方諸侯各有戎事將發內布外而王命急宣不咨
皇華無以專達前十數輩皆課登而旋今尚書戶部郎李
公中朝駿選次董斯任以西蜀最大南縣多賈委之斯來
于以葳事是以數年于茲卒多前功冀公憂國忘家一心
同德方錫貢以納貺度於常算故泉穀之分必先此矣達

于上京然及方鎮遂能入者億計行者接武秦郊不關持
此更費冀公之勤其國本也如此李公之達于時用也如
彼使乎誰務將膺對駸挾兩驂以戒途歌四牡而復命北
驛開餞中軍宴私滿院香風雜花潛送廣庭張樂妙音交
作冀公以請召未許送君先鞭我心如馳不敢留止行復
題已赤管俯伏青蒲答天子休命當使臣之始賞者爾

送峽州劉使君忠州李使君序

國有戎事今茲十年外姦內宄略無寧歲是以人之思理
不教而然者久矣夫非良二千石則無以光昭帝俞勤恤

人隱自邑居蕩析牧守承弊中和頌聲斯道寢息今皇帝
之臨御也嘗垂意於理道夫能官人則能安人爲官而擇
人俾受永賴尚書駕部郎中劉公司門員外郎李公分命
之拜中朝駿選劉公之舉也以宣慈惠和李公之得也以
溫良恭儉咸推大略仁而愛人文學政事家邦必達矧茲
偏隅由我專制苟利於物其可易乎然後理兵期于知禁
求瘼在乎不擾澤流愷悌汔可小康豈潁川之姦黨散落
濟南之畏如大府而已哉壽星之會涼秋八月言辭北闕
將驚南轅惜五馬之不留合六官以追餞乃卜勝撰吉咸

集于吏部郎元公之居室地遠朝市家藏水木納終峰於
宇下道漆園于方外風迴景泛匪寒匪燠入室而芝蘭襲
人趨庭而珠玉交輝琴言自清座右必誠夫然則行者可
以慰遠道居者可以依翰林二公於是撫席而言曰西楚
風殊東巴路迴高堂雲雨遇荆門而可見皇州冠蓋別瀟
水以長懷多謝故人醕我以酒寵我之作羣公何謂以不
腆斯文遂冠于篇首總南宮之賦者凡四十有六章次之
爵里亦當使君之佳傳云

送賈中允之襄陽序

孔宣父說儒者之行有自立焉有近人焉有交友焉研精六藝較明舊史貫天人之際探得失之源非自立歟仗義而居立信爲寶難得易失不謀苟合非近人歟終始之要膠固也患難之失身命也益者損者吾其擇焉非交友歟夫然則道之將行周流四海而無匱者庸可旣乎頃年隱廬山之霧去秋舉湘江之帆聞有道而來終有得而去所合必義所依必仁凡諸揖奉惜此言別累卜勝餞屢邀醉心雖雲蒸霧毒猶勝炎風而疎桐衰柳亦傍秋色時之所感事有攸會切於覲問而速是行者則尚書季父領鎮南

之軍伐淮西之叛方除天地之害載戢干戈之威用重望
係人渴日爲久與尚書備相知之分憶昨執手于今三年
負累遐荒莫由展禮南北不援我勞如何願卽寤寐之勤
永奉通明之德

送太子僕馬公序

嘗讀舊史氏見汲長孺之爲人與之並生其時則隨從長
者不敢避風雨况今之有人而捨勤乎太子僕馬公骨鯁
端莊則如此而布和展惠信而好古煥乎其有文章則汲
生之所不及明矣方將搏空直上高視寥廓秉尚父黃鉞

登范睢青雲顧夫蒼生不爲負矣屬羣盜未息四郊猶虞
春闈無事冬日可愛故自南自北從諸侯遊如竹箭之有
筠雖霰雪之奚及未可量也予固不敏奉以周旋幾合獻
酬之禮且陪文酒之事青溪白雲引我歸思槭槭寒水颼
颼冰岸道勝獨往高歌以行夫至人達觀物無不可出則
耀金組入則狎華蘿蓋與時消息在我舒卷羣公悵別則
如之何

送趙評事之東都序

大盜旣滅東郊遂啟前馳龜蒙左夾遼碣過數千里革戎

反華彼阻戎之餘承復禹之慶駿奔走滌怨思兼諸匪人
因得請命連踵闕下歸甚忘亡是以厥田厥筐之貢不待
錫而至者已紛紜於長府申命職方郎中滎陽鄭公達於
伊洛以總其事夫劇不可以專精故資於命介道且求於
兼適必託乎至公大理評事天水趙侯當交辟之下膺至
公之選罷戎西府受詔東周虛舟出不繫之外景鐘爲待
叩之用故士君子隨之而不避風雨則文行忠信不其未
歟鳳翔尹兼御史大夫高公勤於客禮迫此王命曾是公
器與時共之追鋒告行惜別而已行軍司馬侍御史李公

金匱要略卷之五
玉帳居左金罇敘離羣公當筵相顧不足白日陶暑青槐
好陰牙幢宴如亦旣醉止左右歡甚詩人興全爭論逸價
特以餉趙故拜命之辱輒冠于首篇

送譚正字之上都序

皇上御寓之明年布和發號其在野無遺賢將以啟迪理
本蓋古先哲王之前大者分命十使周流天下弓旌一舉
澗陸其空戶部侍郎趙君故得譚子於瀟湘矣譚子受薦
不拜趙君當薦不避朝廷官之不疑君子悅是三者之備
公也者其至矣哉况恭懿明允文爲在禮發言有章臨事

不惑可以入備顧問出咨典謨豈止祖述六藝指歸舊史
栖遲龍樓之下寂寞鉛槧之間哉僕孤奉盛明黜佐藩徼
不自意而邂逅相遇念一老而得之周旋嘗與語言爲我
消息日月之會時惟季冬星迴於天歲且更始晦慘蕭索
長年所悲豈堪伊人告我以去方將背九疑之積阻泛蒼
梧以連海經界于分廣會合于上都謁崇明馳象魏講舊
於知己從事于吾黨雲霄之外自此而階遷客者何敘之
而已

送劉協律序

予廣德年三掌注起居建中初擢修國史討論之際嘗覽
周朝作相奕世載德名列於紫微事傳于青史者今協律
劉侯之先歟協律富有文采挺然秀拔懷長策以待時感
知己而爲用似續以才而不階門戶求合以道而不憚風
塵士君子之行有足多也零桂雖秋涼風未至江山緬邈
言出東路帆席悠悠指途南海南海有國之重鎮北方之
東西中土之士庶踪連轂擊合會於其間者日千百焉况
中丞元公載輯斯人言愍其旅金節始按休聲洽聞求賢
重官方賀封往老夫病矣負累杜門幾煩相問挹我以禮

愧無風水之便且有登臨之別行矣自愛吾無間焉

送紀奉禮之容州序

紀氏之子曰文楚資於事母而敬愛兼則百行可知博於好古而功業著則文采可知丈夫於代能有是而無倦加體道以自牧出入中外身無擇行爲不達者未之有也頃屬世故家貧背胡越嶺執爨以養當車就安人皆知之用是不乏所以長者繼轍來者升堂旣榮于親又悅其子甚大慶也夫時有通塞事有從宜親安道存適則爲可容州經畧之府南據交趾北達蒼梧李郎中受委中朝聯典大

郡凡有化理悉爲世程紀子嚮風慕義不遠千里釋板輿
卽輕舸晨餐夕膳不改舊物從一樂土之一樂土誰其間
焉卽中之愛子良鈞業擅家寶官登王畿美秀而文芝蘭
可襲吾子一見足以滌塵慮慰客遊與諸子之得子亦何
以異也行矣自愛時興元大赦之仲春桂林遷客于邵之
別序云

送李校書歸江西序

與子中外表也親之至也異姓莫先睽隔不面老而方合
可謂長歎息矣曷期遠會于零桂之間哉大火之交南秋

可畏其歛如蒸其華轉鮮昏霾而禽鳥欲絕曦赫而薄鑠
無措易練不足以禦流汗並燎不足以敵炎氛予遷客也
是甘其艱子薄遊也何在此弊况依藉門戶本儒家之文
行總貫陰陽乃王官之武備聰明精密道不苟全真吾人
之益者也以世多故始家廬陵悲鄉國之眇邈想邱園之
蕪沒羈旅南土復何言哉季子無金未下妻嫂淮陰寓漂
終取王侯無以風雨爲晦無以名位自薄乘時體命其乃
光乎予屬湘東之命子有澄西之役非適之適我勞如何
雲天茫茫行矣自愛

宴餞崔十二弟校書之容州序

方伯盧公因牙門之清淨闢前館之爽塏乃命宿設具牢
加邊言邀故人以寵行也清河崔子曰真源嘗典校石渠
應諸侯之聘踐言勵行積學累藝而建中初天下文明懼
乎遺逸黜陟十道君舉先行有詔集於京師將以更秩旣
而容管經畧處置使隴西李公從而請焉猗歟真源以受
命底祿已利也以從人之求國務也身不可先于國祿不
可急于求翻然迴車假道于桂盧公執疇昔之好惜今辰
之別朝陽初升賓筵始合子夜云艾主賦未晞觴觴交飛

而取樂塤箎相協以奏雅盧公意未之盡將命以篇顧謂
遷客曰罷論幾何日輟使復何日請子之敘我今夕于子
離席而辭曰老者敗者僚者末也憂能傷人思無可者公
之所命其得人乎公曰得哉是敢操簡而進發言有素一
以論我公之講舊一以樂李公之得賢風煙不殊南北暫
間顯允崔子勗哉令聞云

送蘭舍人兼武州長史序

舍人丈以元昆尹京之明月始爲西府連辟將展驥足于
廣西之地所以懲彼叛亂與人休息君子謂此舉也得於

治理失於屈賢譬諸汙地而集鸛鳳矣然則國家多故亭
障猶虞不爲利遷可以道進所居則化我何在焉况瓌姿
偉望約之以禮兄友弟悌必因子心無終食之閒違仁矧
三州之與四海云爾哉勉此于邁怡然告别羣鶯尚囀四
月猶花長江一望翠屏如畫佳興滿目曷唯宦遊監察御
史楊公特進兼鴻臚吳公慰相宴接情言不盡諸公陪歡
各以義洽邵野人也實忝中表趨風自允渴日增勤俄然
叱離如失羽翼郊垌之送惜也何言

送蘭侍御使還序

河隴之塞秋爲邊防每歲徵師郡縣强家之子能控弦帶
甲勇爲人敵而應召焉行軍司馬侍御史藺公戒茲戎昭
來閱軍實威用震罰而不及人爰興六月之師集我三邊
之事況長源自清但挹朝海大厦已構尚勞持斧位寵杜
詩之選職由韓厥之寄參彼玉帳鎮茲金方亦旣勤矣由
是正風俗恤人隱刑章無頗頒賦唯允上行下效心莫不
盡大鴻臚吳公國之良二千石也必先中權之令載勤東
道之禮金蘭用譽風味相合樂只君子會于公堂清絃發
越洋洋乎盈耳一夕三醉主人曰未也若然者羣公陪歡

其有聞乎秋八月鷓鴣始鳴眾芳皆歇我有歸思整轅而
西晴川浙漚日上旌旆寒野莽蒼風入筋幹况肅殺以時
虜騎方下元戎之師且有後命行軍欲久留得乎請言詩
以寵餞薦周旋而不墜耳

春宵餞盧司馬丈歸澧陽序

丈人承門戶之資擢衣冠之秀司武湖上休有令聞移家
澧陽吾取道勝蓋內緣世故從所擇焉况端公丈二十年
閒王事靡盬開物致理洽聞朝廷辟公府而載我鐵冠鎮
方隅而寵授金鉞膺我重寄每懷離別豈不欲往職是總

戎六丈念切在原崎嶇過嶺亦既至止自冬徂春二龍齊
驤黼黻交映出恭入友論者榮之春二月中車戒僕言首
歸路凡我同志猶惜別如此而况端公是日之心乎觀察
判官鄭公初筵叙離方繼以夜願畱侯騎陪盡此歡舉白
而眾賓已酣未晞而主人猶請邵上負明聖來佐藩隅終
沐廕床忝招座右睹今夕之樂想分歧之恨豈登山臨水
而曰送乎

送前鳳翔楊司馬赴節度序

御史大夫李公擁旌旄領鳳翔尹西控數州之地將戡定

叛亂糾遯寮吏未及下車而思其人故司馬之才膺此駿
選幕中之畫居然有待公頃佐是藩天蹕在雍戎馬鉅計
注之有司大東小東無不仰給日承顧問休聲四聞人到
于今咸受其賜交辟之下得無光乎况宏畧泉深碩謀雲
蓄材氣自逸禮容必循鴻鵠之舉烟霄可仰在此行也公
之友兄銜命在館繡衣持斧金玉相鮮不由其門孰見庶
美驥足方騁鵠原惜別河橋一分雲岫千里鳳皇潭上刁
斗初傳寶雞祠下旌旗不卷以此送遠豈如贈言行前鶯
花亂我心曲千旄美得賢也二三子取而賦之

送王司議季友赴洪州序

洪州之爲連率也舊矣自幽薊外姦加之以師旅十年之閒爲巨防焉當閩越輿區扼江關重阻旣完且富行者如歸迨往之國今大和會故朝廷重於鎮定咨爾宗枝勉移獨坐之權實專方面之寄七州奔走而承命一都風化以在我是以王司議得爲副車況加彼數賢爲之爲理何憂乎杼軸爲弊何畏乎寇戎不奔歟然則政由宇下風馳境上上下下之交理道彰矣良辰歲首羣公敘離蒼然霜林墜葉爲聚別怨旣如此歲窮又如此豈長年之所獨悲抑同

人之所增歎邵史官也職在書法以中丞宣力王室以司議碩畫幕中予將書之行矣自念

送張中丞歸魏博序

大河故瀆魏之輿境魏大名也今國家以連帥之重特命右僕射田公以鎮撫焉授方面之寄爲諸侯之倡職貢不俟於命錫朝奏必資於佐幕是以張侯有獻歲之會一之日天子勞勤于次二之日有司行賞以秩因題柱之舊榮加專席之新寵風生漢闕價重周行光照帝俞僉允時望且端揆有度材之鑒中司懷匪石之心溫溫恭人表以光

大多矣恩逾三接詔復兩河向銅臺之地遙覽上京之春
盡柏署追餞粉闌惜別才兼二美識者榮之今襄海無虞
人神助道遵我王度樹之風聲有來雍雍信足樂也詩可
以羣興而羣公賦之

送盧侍御赴恒州使幕序

聖朝以上台清河王鴻勳茂績焯見羣后俾兼綰中樞將
二十年南征北伐投艱排難則倍之矣是則國有恒岳以
公配之而有土天有上將以公委之而分閫勤則至矣位
亦極矣談者爲美其誰閒然故得高枕安邊包茅述職出

獎忠義入延秀異不遠數千里而得盧君君亦感激知己
奔波從事雖立資於時實由昔用譽不家而食盡室以行
峨鐵冠而利往陪玉帳以叅畫何風雲會合而至是乎初
此行也鍾陵有連帥之府落帆江浦上謁告離府公以稟
命則同獎王室修好則不間遐方爰遵上公是厚賓介我
以雜佩必先餽牽便蕃初筵禮無違者元冰仲月白鴈南
飛大舟橫江信宿千里且務從軍之樂不賦苦寒之行蓋
時人義之者多矣僕江西旅人也趨風明庭同等見顧常
忝座右之客不賤屏外之員送君此行抑有由也然安得

容容摻子之袪乎

送高侍御還鳳翔序

高侍御文行忠信士林之秀者也御史大夫崔公大勲旣
集視人如理高選入幕實佐戎機至於是邦隱若敵國攬
轡之後郡邑以清若然者艱難之時事鮮不及矣十一月
河冰始堅山葉皆盡冒此寒嶮居於漢陽且欣郊迎然後
疆事昨又繼燭盡使君之歡今之初筵合舍人之宴入室
而喜親狐白當杯而願解豸冠熒煌蠟花可以醉止請贊
露晞之賦用慰臨歧之恨爾

送鄭判官之廣州序

今年夏日月會於鶉火公治分汴東之幕經度邦賦於桂之南議絕乎爭蒸人得以相慶秋九月薦加五府之命自嶺之外一以咨之而中丞包公舉賢任能捐萬里勞費之煩委一都專達之計我州我庶雖違德實難予取予求而受賜猶舊觀察使范陽盧公愴雲天之忽聞惜姻好之遐阻置酒高會邈歡累日誰言醉止必待露晞然後維舟陽江宿設候館遊以舟楫欲別不能漲濤湧濤長空不分須外徼以內賦詠蒼梧之白雲所以道與簡會壯遊心逸聚

散之分我勞如何况公風監恢達博聞明辨從事貞固守
常直道奉緇衣之前慶乘扶搖之上激作人之表予所望
焉昭昭令聞日賀光大矣

送尹判官之江陵序

文者人之華行者人之實不華無以見本匪實無以要終
是以致知在格物物格則知至及夫至也何所不集焉尹
十五官其集之矣故忠信寶於家貞幹珍於國前年度支
翔平糴之法典斯南海今春轉運卽均輸之便導彼西江
豈止度四方經費之用蓋在佐副相尹丞之秩先是太夫

人在堂指途於潯陽原隰煌煌潔爾壽觴由此告歸孰不
稱慶况高門傳綸詔之榮相宅主公台之兆光啟前列我
有憑焉孟夏吉朔雲陰四合風雨如晦江濤若崩南颺未
迴好是行邁老夫沐普恩之宥承近地之遷鶉之首尾可
以交歡言且貺別私其則那

宴餞嚴判官使還上都序

馮翊嚴氏之子曰暮昭宣世業嗣續未廣能讀古訓雅爲
新詩有叔度黃中之稱有季野四時之備故清風襲人人
得披襟而前蓋所嚮者多矣去年冬鄭司勳奉服嶺之役

以掄才官人將子爲介以禮一而貳事則於交廣乎何有
今年春將復命奏庸公以便道歸定省尋水之下可歌白
華龍駒生庭神仙作尉至是邦也而賀者盈門味道探賸
遂亦浹辰以王事期迫不敢怠忘是以元方不得將車而
旋嚴尊猶切倚門之望有以然也與司勲有西掖之舊文
行忠信君子人歟旣與子同事又與子同術不曰追飛雲
霄旣將置之州牧盧公敘別于初筵郎中蕭公置酒于翌
日皆飛白縱飲高歌結歡屬天降霖潦九派會同雲帆際
天行亦勤矣余羈紲未解處墊溺之地與子言別夫復何

聊羣公推以舊老略其敗北俾冠首篇得不謂之牽歟常
山公于邵序

送崔判官赴容州序

服嶺之外列巨防者五而容其一焉自中原多故邑居蕩
析始則有長吏苟完之命今年春有詔特命元公都督十
二州諸軍事資其庶富而宣乎教化者也夫教之以禮化
之以仁俾其歸于王而不隔乎荒則書同文車同軌當南
北數千萬里而述職焉不其遼哉博陵崔公光膺副車之
選秋八月傳次于壽春安豐縣之東亭前臨芍陂渺漫無

際雖淮海之內浸藪則多而勝景之中堪遊蓋少故邀留
貺別非此而何邵孤奉明恩負累炎微邂逅相遇歡戚不
同旣而前多歧路行有先後日暮猶遠自有窮途之泣木
葉微脫更切長年之悲其賦離之什則亞相崔公冠于首
矣羣公其次第之

送房判官巡南海序

兩河稽誅爲日久矣固是迷悖腥聞於天法將汙瀦罪爾
無赦是用調發集于東郊瞻上將于五道興王師之十萬
千金之費實資經度之中別有鹽府旣博之用不勤於人

豈與夫漢武事邊窮兵蜀主以小謀大而較其損益哉則
天下怙亂不得不除宇內稱兵不得不滅總是任者惟我
國楨兼御史中丞包公專其事佐衛倉曹房公分其巡公
英姿秀發相門流慶以公忠爲已任以學行爲身文蹈和
以全真修睦以合義長途逸翮則未可涯冬十月桂林務
要番禹利往輕楫旣具高帆欲張煌煌元公作鎮南海在
公爲外舅在國爲屏臣潘楊佳姻冰玉相映式瞻之地其
誰不懷桂管經略觀察使范陽盧公惜雲雨爲別悵江山
暫聞置酒高會徵詩寵行南天不寒四氣爭暑黃柑未摘

盧橘又花請因眾芳以動佳興將我府公之厚意也

欽定全唐文卷四百二十八目錄

于邵 六

送盧判官之梧州鄭判官之昭州序

初冬餞崔司直赴京都選集序

送楊兵曹太祝兄弟序

送康兵曹入蜀序

送韋兵曹赴上都序

送孟司戶赴山南序

送穆司法赴劍州序二首

其二

初夏陸萬年廳送奉化陸長官之任序

送金壇韋明府序

送河南王少府還任序

送陳留李少府歸上都序

送家令祁丞序

送趙晏歸江東序

送賈九歸鳴水序

送從叔南遊序

送從舅赴陽翟序

送楊倓南遊序

送庫狄縱入蜀序

送盛卿序

送朱秀才歸上都序

送陳秀才序

送冷秀才東歸序

送竇秀才序

送蔡秀才序

送通上人之南海便赴上都序

送銳上人遊羅浮山序

河南于氏家譜後序

欽定全唐文卷四百二十八

于邵六

送盧判官之梧州鄭判官之昭州序

中朝有蕭牆之變王官不開夫莠尚在我憂未弭都人共
駭遠服多虞大唐思汔可之安率土獲將來之祐詔下哀
痛恩覃動植天地更張乎範圍日月復次於黃道人旣受
賜其官爰議其能非其能則我命用隳奪其賜則彼眚何
戴授之二者至於勤斯桂管都防禦經畧觀察使范陽盧
公道千乘之國齊百蠻之化敬事而信視人如傷頃者嶺

外諸守除書中絕內無合契之符外闕分憂之寄望吳隱
而莫至希士變以實難是用舉所知延幕客盧與鄭二郡
有光凡官材定論物格知至今之抑與誰曰不然必能發
準的於彀中化陋夷於度內上以奉知己下以拯黎元力
行近仁於斯爲美何必秉鈞當軸方及於人哉桂林陽亭
南越之勝雙旌啟路舉棹茲始諸公惜別宿設戒期雲岫
座中烟花雨後愛時景之可共悵高帆之不畱遷客于邵
書其事

初冬餞崔司直赴京都選集序

大官大邑唯賢者主之臨安大邑也而崔公兼領浹年之閒與人致誦雖更化有命居之無何然與人休息行難爲繼矣屬太夫人在堂閨門之敬舊家於漢上張仲孝友行思板輿譚公維私式歌弄印崩波沿沂重阻疊里亦旣至止稱歡壽觴前彭州司馬公之元昆所遊有方嘉此良會皆才膺開物刃有餘地從士大夫遊必先曲禮二龍方騁未可量也國有衡鏡人歸品藻十月良日駕言北遊當山公持刈楚之鍰信多士發長鳴之日也以彼前慶續茲高選雖欲勿用其若才何雖古人捧檄在此行也因同人惜

離出餞于野遠山四合長空沈寥望青林而不盡看白日而將暮忝座右之末陪難孫之行不腆斯文俾專序別蓋讓之不可遂冠於首篇

送楊兵曹太祝兄弟序

天寶中謬掌鉛槧領卿大夫門子出於龍樓以鼓篋爲事是時與楊氏兄弟相見於今十年矣曾不以薄劣移意克全乎相知不出樓數年各以才進果行敏德依仁據義焜煌而金玉交映肅穆而風塵不雜入其門森森然是所謂難矣屬中原多故荆棘未翦竄身郊山復與合疇昔之好

實獲我心今年春青羌白氐相率爲虐震我郡邑毒痛生
人而楊公侍親日有憂色擇地以養告别遂行是以二王
趙蕭四族偕往懿親密友義切同舟並駕而逸足相追拔
茅而彙征斯吉方將導黑水以合漢適樂土而中權豈止
奔波雲山悵望歧路而已哉蓋隨之爲義也大矣巴防楚
塞援聲千里東出桐柏南距荊州三江五湖可以利涉心
斷印舌薄送於郊非斯人之爲別吾誰爲賦矣

送康兵曹入蜀序

與兵曹公敵惠於今三世矣然則子之大人某當肩隨之

日雖中年隔別而榮問不輟不虞康子來涉吾境見父之
執果於覲親可謂達也况風骨爽秀機會駿發約之以禮
博我以文青雲之姿於是乎見矣以日迫諸寇家君在蜀
乘閒赴覲靡遑底寧曾未信宿駕言于邁以此道別無如
之何副相嚴公總統江劍東西郡邑蓋以百數皆風靡波
偃奔走乎大府威名之下誰不心注且鳥擇高梧人歸如
水吾子之往矧有舊乎郊垌之南于以送遠楊柳雖綠我
意悲春喬梓有方君心是慶白華之美者故歌而道之幕
中有行軍馬公判官張公書記崔公高副時選相期郢匠

執子之手幸謝故人

送韋兵曹赴上都序

韋公顯名三蜀出入東西川垂二十年矣至於是邦必聞其政蓋禮者德之幹利者義之和由之不失其道也噫夫克有具美而抑與之徒淹歲月未上霄漢俾其知己者慙而已雖多亦奚補於時議哉有以知君子不見而彰義然後取信吾寶也杜陵鄉曲千里而近楚王壇上瞻望仍遙鴈隨陽而昨夜初過木落山而寒霜始白今日何日江干送歸豈無樽酒可以畱餞國家開設會府綜覈九流衡懸

而不欺輕重論定而必先遠大之子之往求善價而沽諸
乎愛惟允將美利而利物夫然則家之肥而國又肥也南
山之山日復羈齒時因便風無金玉爾音千里韋生跂予
何日

送孟司戶赴山南序

今之天府急賢爲事者多矣然則中丞張公賢而佐之公
總統巴檄蓋郡邑百數皆夙興夜寐奔走乎梁州一方無
虞千里坐嘯何寇盜之敢暴不澄清而彌肅所以賢與不
肖有別而孟戶曹應辟焉非夫學究精微德舍光大貞幹

克副於公望勤勞可著乎王家豈中丞之與能而幕府之
英選能致於此閏四月告輒指途出郊相餞昨夜殘雨朝
烟稍霽黃鳥上下綠陰若浮此時送君微我無酒况東郊
西郊鼓輦猶作征軸之弊又急乎安人勉旃孟侯無以自
媚

送穆司法赴劍州序二首

決曹掾穆侯理行歸於劍十月寒矣艱哉是行休於嘉陵
之陽日與樵牧爲伍而吾子言涉江水至於室廬告輒之
期不遠千里然則取諸羽翮擊彼風水時之來也鳴可驚

人所愛親之道敬養爲切安得擇仕而以三語爲屈哉東
江劍門又足助興地氣初開河風稍嚴青冥爲空黃落向
盡感物論別者庶存乎歌詩

其二

人謂穆子通於理者也裒然作掾榮問所致自隴之下清
風可挹人能盡歡即真知勉矣頃以令弟仕於劍太夫人
就養適乎遠雖迫王事心馳倚閭朝辭府庭夕次郊郭不
俟高駕拂衣而南羣公錫類詎敢留心各以壺酒垂楊好
陰金秋始交火雲猶赫指日獻壽在原增光送君遂行干

萬無盡

初夏陸萬年廳送奉化陸長官之任序

予籍奉化君之猷甚矣今也何幸辱與萬年君遊而獲展禮焉公有入室之清行有專門之奧學加之理要飾以藝文三十年中猶宰一邑是何奇偶之所不倫乎先是公由外署嘗攝行此職未拜真而復罷人到於今思之豈彼人之幸猶多而資公之政爲理不然奚十年之外復與此合耶况今年吏曹尤難其選天子申明乎詔令宰輔論定乎官材天官卿孜孜於取捨膺此舉也授受者安易爲力哉

金文公集卷之二十一
拜恩前殿隨牒上道萬年君軫陟岡之歎愴異縣之違敘
離公堂言具旨酒二三親好獻酢有章旣敬而兄又悅而
弟上友下悌何其犇歟鶉尾之會火雲初飛前春花木是
日仍茂感而惜分於是爲切夫以卿士大夫之會未嘗不
引詩人之興以宣其志萬年君所以進牘抽翰邀文屬辭
蓋合斯義將用貺別云爾

送金壇韋明府序

將理大國若烹小鮮不敢撓之故也况子男之爲邑庸可
撓乎方今兵薄四海師老十年罄人之耕桑窮人之術數

勤以奉中國翦以賜諸軍軍興猶艱國議尚乏非夫表微
物外洞鑒人間曷能除其災害拯彼塗炭於戲天官氏得
之於韋金壇矣公文以藻身行以勵俗道必孚於損益名
可達於家邦醇粹居中而英華發外且三辟大府連衡者
人皆奪容一登廷評獨行者我無慍色樂天知命君子攸
難偶爾墮銓序之勞超然在甲科之列豈無清切之地竟
迫親人之選飛鳧此去逸驥何施然則其崩角所不容悼
心而無告者我實行矣爾何對焉鍾茅之間化可見矣厚
地始坼寒山盡空同雲不開積雪增沍折楊追餞蔣亭愈

邈心乎愛矣何日忘之今之送君感別而已

送河南王少府還任序

王公秀出士林香傳國譽玉立增映金聲自遠故弱冠之
後代爲文人不四三年而交辟如契豈惟鴻鵠志在千里
自是鳳雛生而五色今大夫當弄印之貴積蒼生之望立
程朝端舉正天下少府公晨昏之際戀深獨立爰自東洛
達於上京且因王命得及私覲喬梓之慶實爲時榮然則
赤縣多務不遑久留素琴在御匹馬云邁清風霽景隨我
佳興又足名也頃忝臺憲出於門闌遂使小子知名敢忘

國士之遇心乎愛矣此別何言前郊一葉涼風已半金吹
淅瀝淒然欲寒兵部員外郎王公以從父之仁敦北阮之
好猥顧同舍謂余知音相期都門方以送遠才子東矣得
無斯文

送陳留李少府歸上都序

天寶年中以公持刈楚之柄言采其華將拔其俗蓋良馬
逐逐在公之伯仲乎忝嘗齊衡永以爲好迨茲二紀相逢
蜀遊不虞斯來復與前合况總括六藝又擢一枝青春之
年黃綬標映瑩若玉立踴然鶴峙長空無倪可以直上人

之望也今諫議大夫崔公冀國之貴介弟於公爲外舅焉以兄弟之子猶子也冰玉不間潘楊載睦始君之來拜乎姻婭由君之美加乎愛矣東林表邈公遠鑒南宮實夫子知賢光昭好述能以德選自中形外論者休之實沈之會言旋上國蜀多名園載酒交餞雪氷初下同雲始飛寒暄正中跋涉無苦予亦羈齒久而越吟曷爲歸期十月良日方將尋鮑子之舊復田蘇之遊若君此行不歎叩否尚書兵部郎趙公謀以貺別尚書虞部李公作爲新題羣公僉同各以位敘云

送家令祁丞序

祁丞公表微造理之士也嘗精其思而深於詩警其神而存乎象深於詩者得之於風雅存乎象者受之於丹青非奇峰絕壑則不能運其機非緣情體物則不能動其興機興之作爲達者多之去年八月閩越納貢而吾子實董斯役水陸萬里寒暄浹年三江五湖覺然復遊遠與爲別故人何情虞部郎中岑公贈詩一篇情言兼至當時之絕也凡敘所以廣意旣先見我又何載焉送君都門舉手千萬

送趙晏歸江東序

判官擢天府一枝之秀居十二年而先其文章用譽聲馳
寰海內行修潔正爲人言故王公卿士願見顏色皆延以
座右挹以上樽結平生之至驩聽傳習之餘論翕然而風
靡矣自隨牒吳楚諸府交辟有車轡轡無一日而止故驟
遷於維荆仍假治書亦旣達矣今上觀兵鳳翔之歲公以
錫貢會於闕庭舉朝廷首以望真拜屬多難之際蒼黃易
誣斬馬未聞於去佞宏羊且偏於用法是有流沙之譴不
及旬日至於五原犬戎合圍我在堅壁以功復爲詞曹外
掾雖雷雨作解而風塵未厭流離辛苦又屆乎漢陽雲天

路長骨肉爲念將欲出三峽浮三江漸達於吳會接行鴈
於舊地問伯魚之他日蓋生死骨肉之會豈勝言哉大寒
之歲衆木皆死相彼松柏雖復小凋而貞心勁節不改柯
易葉實君子之大端也持此貺別不知其他

送賈九歸鳴水序

賈生深於義者也又能保和天資強學不倦甘禦寇之執
轡處原憲之非病行於林泉蓋數周矣實沈之會賁然來
思南郭之下言尋舊好顧州縣而不爲道屈齊得失而介
茲福利實君子之大端也知我者鮮謂予知之朝夕之驩

經時不去式歌且賦嘗至於夜分不知天下之秋颯然而
至咏采薇以獨往始班荆而送別南指蜀路江山四蔽苟
吾道之可存居鳴水而何陋是爲不侵不叛之地得以長
處約矣乃知全謀決策可以遠馭青溪白雲時復助興二
三子豈知樂在其中乎出郊之時論別而已

送從叔南遊序

叔父乃相國東海公猶子之慶裔今少師郢國公外王父
之介弟也生於台庭長於儒門修先王之典禮操作者之
文律斯亦叔父立身之道宏矣屬時艱難流離辛苦田園

蕪沒族黨淪謝斯又叔父厚生之道窮矣三十年間爲東西人豈無常科亦有世路道之不由吾其與也得非恢達自是處之無悶耶况郢公和義以仁如存展敬居常館給不度以年因得造寢席問起居不敢墜睦親之禮久矣夫不羈之才若不繫之舟不然則何以泛其流而析其滯歟旣而將登商顏尋綺季翼儲之顯晦進浮滄浪追漁父遁代之始終或經九嶷或入五嶺探靈感廣異聞崇朝命駕來告于邁不憚者結遐方之離思所賀者從諸侯之勝遊敬奉觴以祖輶遂贈言於慎夏云

送從舅赴陽翟序

昔者秦賦渭陽之詩蓋孟公子之出祖也綿歷千祀頌聲
不泯幼失慈愛於斯爲苦未嘗不廢卷撫膺書紳自勉以
爲罔極之報祭在如存之禮不其然歟自幽燕稱亂伊洛
內覆爰我舅黨舉族東遷柘室無祀名園何在永懷展敬
渴日無緣叔舅十年過江三命作吏慶垂必復休有令聞
使車斯來輒不自意陽翟駿選天書寵光思同晝遊有日
矣伯舅京劇先鳴曷遊偕往小子江華罷守未離繫滯指
途惜別卜勝初筵當獻歲之方春對上林之晴雪興酣景

晏欲罷不能則叔舅之慈惠鍾於我也良可知矣望鈞臺
舊都返伊川故里出鄆郢長道控河淮要衝於焉馳名於
以在我况清白以世業留遺貞幹以天資自許鴻鵠之舉
雲霄可期慙無酷似拜命之辱敘離道念庸不喻乎司勲
員外郎鄭昌締邵同等也實爲首倡其或繼之者則以多
爲貴爾

送楊倓南遊序

宏農楊倓世以文藝登甲乙科而倓克構前列復修儒行
升高作賦正始言詩期於拾青今也被褐蓋未遇云爾桂

林之遊我何憂哉在幕則副使韋公存乎舊判官韋公置
乎客其外則韓萬州爲知舊則俛不孤客則俛有託知則
俛可遊予亦子之舊也見其來則撫之憂則樂之命諸子
以同之其他則不如二三子之強大嘗所愧焉忽有餘興
言將南邁尋桂江之遠近度疑山之險易適諸侯之館披
三越之圖並蒼梧以右轉觀象地之發跡亦何謝泛五湖
探禹穴而暢其孤憤哉扁舟一葉風濤千里於所適復何
危乎吾當俟子於壽星之會而復祇命所在念此無忽興
元之元季夏之望河南于邵詞

送庠狄縱入蜀序

夫以禮樂爲用檢身若不及者嘗聞其語矣今見庠狄子雅而有之況心氣爽練尤於妙理原憲非病黔婁自安沽之哉吾待價也漢陽之禾人食如玉有妻子以宜家無餽粥以餬口余承艱否又不能救夏四月告余以行舉家杖藜將赴於蜀蜀多奇士吾道其南風水之便宜未量也隴俗春晚梅花始發言送山路蕭然雨寒四郊多虞舉手千萬

送盛卿序

老夫負累炎方僻處南館東阻高岸西臨通衢衡門寂寥
誰與爲晤數日之後而得比鄰盛卿者睠道以閒處約以
靜詩禮日訓柴荆晝關嘗思急病之用載勤稽古之力每
接以三餘時復一見來不飲酒去無可欲儒之敬慎有如
此者春三月叩門告別且曰本剡中人也家於錢塘一入
桂林十周星矣慚走長安之道將尋吳會之事乘其波流
聊以自適僕老者病者以憂以悵留之則難別又不易子
之不飲不可以斗酒歡我以窮途無得以束修贈執手分
別傷如之何雲雨一散江山萬里東西南北其有會乎遷

客于邵贈言而已

送朱秀才歸上都序

嘗喜南中之遇墨客者甚矣今又得會稽朱因卿焉序而
字之蓋美之爾況其學也博其文也精凡作爲篇章皆可
興咏處之於代則詩人之選也邵故東西南北願與修好
從可知矣始至之日贅見於我府公府公答之以客禮亦
旣館給終焉宴私高枕延國士之風開門多長者之轍義
非苟合道不虛行叩清徵而況我知音執禮容而許我先
達歡於老夫接辱與允子遊風雨如晦孰云其已而北走

長安萬里帝王居治所也賢關啟鑰哲匠見焉鵬搏鳳翥造次於是彼美因卿在斯一舉餘勇可賈矧爾轂中瀟湘悠悠鄢郢阻修商峴衡嶷白雲閒之登山臨水楚人之重別也人涉叩否衛詩之歎異也雖欲勿歎得無歎乎

送陳秀才序

秀才以我府公有元昆同官之舊邂逅不見於今三年故不遠數千里泝瀟湘踰零桂而循來上謁府公府公嘉是來也館有加籩之餼讌有承筐之禮上下交好州人悅之旣而盈卷新文惠予佳句艤舟將往咨我緒言夫閉門循

來者遷客之心也窮巷迂轍者達士之情也以達士之情
眷索遷客不腆之作雖處憂危得無承乎多謝之仁行矣
自愛

送冷秀才東歸序

昔泰卿賦多與太學英達爲之遊二十年間學者逃難石
渠遂閉鼓篋無聞近三四年復與士合每歲以故事選實
而流頌聲則江寧冷侯由此擢秀今乏與比前或少雙是
以中朝宗文當代秉義者蓋嚮風矣不復相鄙愚無閒然
得爲田蘇之遊不負金石之契亦旣多矣吳會之地慈親

倚門冷侯言歸心切攸往白鴈初過青冥轉高駕言東遊
雲雨惜別卻亦是日理裝也始同末異愴此歧路冷侯深
於詩也祕監韋公敘焉其爲歌詩以出餞皆漢廷顯達士
林精妙各附爵里爲一時之榮卻何言哉貺別而已

送竇秀才序

曩歲忝西掖舍人與秀才同官遊朝赴玉墀夕下金闕於
今二十年矣今復左遷僻地羈旅信安不期東遊邂逅相
遇而能倍年下禮論舊加敬實高標雅裁爲邦家之光故
懷袖雄文予得興咏長途逸足予將企望而殿中侍御史

范陽盧公聿來監州持我文柄解簡書之畏當翰林主人
來者飲德挹之不竭嘯歌攸同迨茲中冬將盡厚意不虞
作別況予之與名輩者乎如何選舟告我行邁羅郭之下
穀川可厲枯桑槭而不知有風暮天晦而且欲飛雪此時
以長年其悲懷哉曷日相會哉

送蔡秀才序

蔡氏之子曰虛舟以十月良日旅次於信安謂余老於文
者展後進之禮清晨來思贈余舊文凡數十篇與之討論
導以無倦蔡子乃盱衡而納焉夫如是則何患乎名不揚

道不行春官卿復將示諸掌乎佻兮達兮亦以永日言飲
之酒時無閒焉客非滯者遊有常者言告言歸明日遂行
雖江南地暖於景度短急張帆便風猶可及遠蔡子其將
邁乎常山公于邵敘別

送通上人之南海便赴上都序

通公釋門之秀者也生本達節出修梵行表之以威儀文
之以外教始具戒於衡山之下瀟湘之間嘗以律人法雖
可住而相不可仕是以杖飛錫入五嶺將遠舉於羅浮尋
跡於現靈爲矯其因而集乎緣遊其方而廣乎志洪惟通

公之爲心也其至矣夫猶復厯天柱訪爐峰背淮淝卽嵩
潁翱翔乎中國以及乎上京上京聖君布政之所也公觀
夫宮闕則曷若西方之諸天公接彼龍象則曷若西方之
衆聖加以探密藏傳意珠發揮象法啟迪來學在此行也
扁舟而南溟漲茫茫要荒積阻動千萬里歲月不之計歧
路不之悲曠哉釋子不可得而攀也

送銳上人遊羅浮山序

釋氏之有出家猶儒門之務行道旣得其道則思其通過
去諸佛以故能聖則出證於無生歸於等觀安可倪乎有

乘精於斯勤於斯乃至旋頂無苦剝身為樂赴湯蹈火而不捨晝夜者是夫銳公天縱明惠學究多聞誦詩三百而言思無邪閱部十二而義心自了寄文章爲語默任施捨爲行藏內修爲法律外習爲祕苑予則不敏人皆仰之前年背自瀟湘登桂嶺大人君子延方丈之室與論實相下士齊人奉次第之食爲說皆空習靜而外郭永安得朋而西山有寺青蓮宮裏日月宵中雖法侶常遊而吾儕不閒嘗憶浮山是蓬萊一島浮來與羅峰合秀寶房瑤室七十有二松閣石樓千百其數麻姑舞鳳之地葛仙蟬蛻之所

將欲導殊勝廣異聞銳公此行天下莫二矣十月良月晴天愛景密葉彌茂繁花不寒羣山壁立而合沓百蠻長江海連而澎湃萬里搜奇索異可駐行舟懷哉勝遊不愧相送迨春之冰泮期我於荆峴之間乎

河南于氏家譜後序

序曰邵高叔祖皇朝尚書左僕射侍中太子太師燕國定公諱志寧博學多聞徇忠秉直爲秦府十八學士其左右庶子不道嘗撰諫苑三十篇諷之凡有文集若干卷於代又述作之外修集家譜其受姓封邑衣冠婚嫁著之譜序

亦既備矣。歷一百七十餘年。家藏一本人。人遵守未嘗失。墜泊天寶末。幽寇叛亂。今三十七年。頃屬中原失守。族類逃難。不南馳吳越。則北走沙朔。或轉死溝壑。其誰與知。或因兵禍縱橫。吊魂無所。或道路阻塞。不由我歸。或田園淹沒。無可迴顧。所以舊譜散落。無餘將期。會同考集。不齊奚爲。修集實難。有待。今且從邵一房。自爲數例。有若九祖長房。今太子少保譙國公頎。與邵同升於朝。股肱四聖。爲國元老。邵之弟也。有若九祖第三房。今襄王府錄事參軍載與邵同在京列。保家履道。爲宗室長邵之兄也。各引才識。

子弟參定其宜從而審之誰曰不可又以子孫漸多昭穆
編次紙幅有量須變前規亦春秋之新意也今請每房分
爲兩卷其上卷自九祖某公至元孫止其下卷自父考及
身已降迭相補注卽令邵以皇考工部尚書爲下卷之首
此其例也且諸房昭穆旣同尋而繹之可以明矣後能代
習家法述作相因從子及孫從孫及子孫孫子子興復宗
祧豈唯兩卷乎將十部而彌盛矣其文公第四子安平公
房此建平公已上三房衣冠人物全少今與文公第五子
齊國公文公第六子葉陽公文公第七子平恩公文公第

八子襄陽公文公第九子桓州刺史併以六房同爲一卷就中第五卷已下子孫皆名位不揚婚姻無地湮沈斷絕寂爾無聞但存舊卷而已後有遇之者知之者以時書之其五祖九祖分今敘在三卷並錄之於後時貞元八年歲在壬申八月朔日金紫光祿大夫太子賓客上柱國襲恒山郡開國公于邵述